

浣月山房詩集

浣月山房詩集目錄

卷一內集

辛丑二十四首

贈蘇虛谷

黃河四首

新鄭過子產祠墓下作

雪夜次虛谷韻

李將軍射虎行

潁亭懷古

述懷兼寄諸同好

汝橋

古詩五首

舟行晚眺

曉發唐河

途中遇雪示同行諸君

襄陽舟次贈別虛谷

漢皋樓題壁

樂鄉關

偶成

途中紀所見

壬寅三十一首

題徐作之歸耕圖

湖上三首

洞庭

紀事

湘源紀行

題李星門丈

熙垣

松陰讀書圖

由靈川至興安道中作三首

題呂麗堂太守

恩湛

射虎圖

棄婦詞

題沈友陶雲龍冊子

秋懷一首和張芾卿

洞庭中秋待月作

詩成月出因疊前韵

岳陽樓

答朱伯韓前輩去歲見贈詩一首

山行道中作

黃陂道中作五首

過信陽何大復先生故里

過彰德

曉發邢臺大風作

以水仙花贈錢萍石同年

寶青

疊韻二首

城南看花和王少鶴

錫振

並邀姚子楨

渾第

錢萍石同賦

癸卯七首

人日贈王少鶴

遊春

讀平湖劉烈女遺事作

秋日作

獻姚石浦先生卽以贈別三首

甲辰五十九首

奉使粵東出都門作

過河閒獻王墓

沙隄行

道旁見田家二首

東阿道中

固鎮題何氏別墅

渡淮

廬州

新晴行山澗作

晚宿店埠

大峽關

桐城

黃梅江漲以舟濟五十里阻風不得行榜人進香稻白魚甚美詩以紀之

題潯陽驛館

過廬山遊東林寺

曉發

東軒

明珠篇

發萬安行山溪作

道中雜詩三首

大庾嶺謁張曲江祠

南雄江上

夜泛

觀音巖

峽山寺

歸猿洞

三水縣

三十六江樓

花田

瀕行諸生餞於花地

卽花田

賦此誌別三首

今年秋典試羊城徹棘後疲於應接知有詩人張南山先生而未暇一訪
挂帆後悵然久之舟過清遠峽遇王恭三明府同年手游仙唱和詞一
卷見示蓋先生首唱而黃蓉石比部和之余愛其詞因題七絕四首寄

正

舟中雜詠六首

中宿峽

補遊水月觀

秋懷四首

喜晤王恭三同年至韶關又言別賦

此以贈

晚望二首

十八灘

泰和大令沈槐卿同年

衍慶

泛舟相

送至廬陵賦此以贈

過黃梅紀所見作

余於辛丑歲請假南歸同行爲蘇君虛谷旅館對牀征車把轡唱酬自適
商訂多資良時難得計相距已三年餘矣追思我友悵然久之

乙巳十五首

春夜

戲贈唐子實

送唐子實歸里二首

登高望遠海

偶成

朱伯韓先生新鐫歌題辭

秋日二首

七夕

天河

送彭子穆歸里

雨夜

中秋對月追憶舊游柬蔣霞舫

達年

丈

八月二十三日一首

卷二內集

丙午十七首

人日同人小集梅伯言翁寓齋席閒有懷少鶴言翁肴饌精美不俗時比之古文家望溪一派因稱爲桐城風味云

夏夜

六月十二日黃魯直生日也蕙西見

約不赴旣以詩見示聊復和之

寓中小園順德梁生

信徵

攜子誦讀

其中賦贈二首

偶作

秋夜

蕙西舍人兄賦諸朋好詩以一章見

及因仿其意用工部飲中八仙歌體合賦一首其人以在蕙西處曾共
燕談者爲斷故視原作有損益焉

小園

得家書作

少年行

讀唐史四首

東坡生日集劉寬甫侍御宅分賦 魯川比部以歛石見贈爲報以詩

丁未二十四首

秋鐙課讀圖爲馮小亭

培元

編修題用吳笏庵前輩韵

上元

買書

邵蕙西舍人同年以正除六品官不得與禮部之試作詩自解其言聞者足戒且深有動於余心者賦此答之

寄懷王子壽

贈蘇虛谷

贈李鼎西

偕唐仲實兄韋詞丞妹婿家雲程兄

同游城南誠氏花園有作

和蕭山相國游龍杖詩

飛雲洞圖爲潘星齋

曾璧

同年題

六月二十一日歐陽文忠公生日也

蕙西同年召集其齋拜公遺像同人卽席分賦得章字

奉和梅伯言翁中秋憶昔遊之作 桂山秋曉圖蔣譽侯前輩屬爲尊公

黃閣太夫子賦

目疾廢讀賦此遣悶

書齋夜讀

朱伯韓前輩將請假歸里出其尊人

詩卷索題勉成此章卽以贈別

贈何子永慎修舍人同年二首

北河

歲春夏之閒河南北大旱赤地干有

餘里乃耆道經斯地見田閒二麥蔥蔚知秋閒已得透雨用是糧價騰
貴而人心帖然豈眞民氣之醇樸乎抑 聖心之感格有以致之耳欽
幸之餘遂成斯詠 陳忠愍遺研歌爲方伯唐公子方題

送黃子壽同館自江南入都

送朱伯韓前輩

戊申三十六首

和邵蕙西同年大雪懷友人詩

舟中閱文有作

贈羅生

舟夜聽雨

阻雨

安陸賈翰林太守築護城月隄方成

而余適至喜而賦此以贈時隄未有名余謂他年當采白傅蘇公故事
名之曰賈公隄此理之可信者也太守方待王子壽比部爲之作記書
以諗之

孟亭

贈幕中諸友

贈劉生

襄陽古樂府二首

野鷹來

上堵吟

襄陽懷古詩八首

隆中

仲宣樓

夫人城

黃叔度墓

宋玉宅

龐德公故居

習家池

峴山

過郎縣南諸灘作

舟中苦熱

贈龔生

舟行漢河閒有作

獻陶鳧鄉前輩

樸

卽送其升任甘泉入

觀

答邵蕙西買書見寄之作

送羅聲谷旋里

晚坐

黃州試畢客有欲訪東坡赤壁者賦

此贈之用蘇公定惠院寓居月夜偶出原韵

遊者爲言東坡赤壁諸勝惜不得往賦此記之

試畢至太守署中登雪堂堂爲後人移建非當年舊址而據有江山之勝
是日獨雨雪宵霽次日清晨渡江宿江夏境燈下有作

贈胡生

送妹婿韋詞丞還里

王子壽王講荊州書院歲臘必歸省其親道過武昌王唐子方方伯信宿乃去今入臘數日矣而子壽不至賦此寄懷

初五日夜小雪二首

歲暮書懷

已酉十六首

贈武陵楊性農

漢沔閒雜詠七首

由漢川至江陵見隄閒居民有作

贈張生

題張別山先生詩集後二首

重午舟夜獨坐

亭午

四蟲詞四首

次梅伯言先生秋後南歸留別都門諸子原韻

辛亥三首

恭送鄭夢白宮傅師奉諭回籍五十六韵

輓李石梧宮保

題鄒中丞鳴鶴所藏林文忠公詩卷

壬子十四首

詠朱伯韓前輩院中紫薇二首

秋夜城樓紀所聞

夕響

南郭晚歸望獨秀峯作

遊風洞歌

贈李古漁廣文同年二首

書所輯漢書分類小記

送孫渠田學使同年入朝請假歸

觀浙中

感事

十一月二十四日

冬夜校彭子穆遺稿因題其後

題灌陽范氏古墓碣榻本

卷三內集

卷之二十七首

山寺

元夜聞燈市喧闐有作

里居

無聊

韓翁齋中賞牡丹賦贈二首

山中聞笛

嘲遊人

三月三日獨遊獨秀峯三首

逆賊陷江南感懷伯言先生二首

賞薔薇呈韓翁

秋夜雜感八首

贈內五首

甲寅十四首

感憤

春日雜感八首

傷亂

內子隨外氏避地衡陽賦此寄之

十一月十一日自桂林北上四首

蘇三娘行

輓蔣春山何雨人兩茂才二首

衡陽閒居雜詠六首

合江亭讀昌黎詩刻

立春日將買舟赴長沙寄懷梅伯言

先生二首

十二月二十一日自衡陽放舟作

村居

謁嶽廟

舟中玩西洋千里鏡歌

乙卯四十首

元日避風易家灣作

泊舟長沙遂遊岳麓書院

岳麓古松

正月二十二日泊舟長沙城外是夕

大風作

長沙懷舊二首

張哲堂拔貢

黃虎癡丈

江干一首

二月十七日舟中自輯漢書分類小

記成再題一首

荊州懷古

宜城道中作

我本閩卷士一首

襄陽寓中四首

南陽懷古

襄陽送友人回粵

大風十六韻

四月廿一日舟發襄陽將至均州作

夕陽

均州一首用陳簡齋將離均陽詩韻

余以五月一日移寓於均將兩旬矣而梁間雙燕忽至感其經歷險遠大有類於余者乃爲賦之

淨樂宮

九月三日將由穀城北上留別邑令黎樹堂表兄

介邱

郭林宗故里

柳子厚故里

萍江大李同年以樞垣拜 賜哈密

瓜見餉率賦報謝

少鶴以言翁近作詩歌一卷見示

陳蓮裳同年

鴻壽

齋中消寒小集賦得望雪限鮮字

輓黎樹堂表兄三首

冬月

賈浪仙祭詩圖爲王少鶴同年題

東坡生日集林穎叔

壽圖

樞部齋中

限用定惠院月夜偶出詩韵是日僕不至聊和此章

除夕二首

除夕理二十年來詩稿感賦

丙辰二十九首

申甫京兆同年前輩雪中過訪立夫少尹世年丈長歌往復情詞兼美喜

而奉和此章

春初侍飲壽陽師相寓宅承賜和霞

舫少尹同年步韵舊作詠雪詩見示謹和二章

題汪仲穆同年

陳藕漁詩鈔

奉題少鶴同年近歲詩稿二首謹次

壽陽師相題辭原韵

聞粵中今歲可辦秋闈矣欣幸之餘

慮其不信爰賦此章

三月四日集少鶴同年寓齋補修禊

事是日爲少鶴初度自顏其齋曰玉池西舫用元人納新詩意也作此

賀之

莫春 耕耨恭紀二十韵

春日寄妻兄劉玉衡

廷機

時以鎮江經歷寓居丹陽

四月三日葉潤臣閣長

名澧

孔繡山

憲葵

舍人集諸同人於慈仁寺展禊

賦詩僕以有事不至賦呈一首 六月初四日蒙

恩補授通政司副

使感述二首恭和壽陽師相南齋奉母補官日記

恩原韵

寄內弟何鏡海

應祺

從軍漢上以詩文見示二首

歐陽文忠公生日林穎叔比部王少鶴同年招同人集楊椒山先生故宅

松筠庵敬禮穎叔所藏文忠遺像分韵得扣字

學紡圖四首爲孔繡山舍人尊姬題

寒宵稱藥圖爲繡山舍人賢母作 瓢城餞別圖爲繡山舍人尊甫年丈

題年丈官直隸之鹽城有循聲以糧艘守凍鑿冰愆期八日被議革職
圖中多彼地紳民贈送之作亦詠歌德政之遺也

鳧香少宗伯前輩以初秋遣興詩見示是日適談錢竹汀宮詹王述庵司
寇軼事皆先生師門也勉和一章呈教

題孫駕航閣長楫徽郎春讌圖 江漢歸舟圖爲葉潤臣閣長題

七月初五日提督向忠武公榮卒于軍詩以輓之

江西蔡小霞封翁八十而誦蓼莪不輟詰嗣梅龔太史前輩乞言賦此以
贈 壽陽師相出示江天極目圖蓋爲介

弟幼章中丞金陵殉難事作敬賦一章呈正

食蟹和王少鶴

伯言先生詩集刻本題後

卷四別集

癸巳七首

春日訪友人村居

黨人碑歌

江樓晚眺有懷

斑竹巖

江亭

將至橋口泊舟後登岸晚遊

登華蓋山

甲午十五首

舟中卽景二首

柳青青曲

贈馬六

望衡

東郭行

由全州抵武岡道中三首

晚宿連村二首

古寺

武陵夜泊

代內子見寄

舟行作

乙未七首

經劉氏二孝女墓

楊柳枝

道中雜詩三首

家書至

送王春濤同年下第歸里

丙申十五首

寓居保安寺贈閔鶴雛一首

漢高祖宴沛宮圖

擬塞下曲二首

過寶店

漳河懷古

岳陽樓

黃陵廟

中秋對月呈王鵝池姑丈及家穀士

兄

寄周受田蜀中

朱少香銓部同年歸省晤於長沙賦此贈別

重陽步王鵝池姑丈韵

擬玉階怨

擣衣詞

丁酉二十九首

古詩四首

題路華甫先生秦淮水榭圖

又題莫愁湖圖二首

送春

五月十二日夜紀夢

易貞女行

自君之出矣

贈張芾卿四首

將之龍標留別張芾卿一首

喬口

沅湘竹枝詞二首

桃源

晚泊一首

清浪灘

鷓鴣謠

卽景

辰陽舟中

將北上呈黃虎癡先生兼留別二首

澧陽舟中聽雨

聞雁

戊戌十八首

漢陰阻風

寄懷張芾卿

和芙嫖女史題壁絕命詩疊韻四首

峴山

舟次沙陽將由此歸省龍標留別同

舟諸友

對月有懷周受田歸省蜀中李卓峯

歸省閩南周稻村閔鶴雛李鼎西旋里

晚眺

過沅江諸灘

舟中遇雨作

擬古樂府六首

陌上桑

長干行

大隄曲

烏夜啼

湘中絃

獨漉篇

己亥七首

寄懷孫芝房

新秋二首

龍標芙蓉樓懷古

庚子二首

送蘇虛谷歸里兼有山左之行二首

卷五外集

癸巳一首

清明

甲午三首

楓木山

贈榜人

洞庭湖

乙未四首

寄內

夏旱 上親祈雨卽日甘霖降敬賦

此詩

鴛鴦戲蓮沼篇

丙申八首

田家詞

題張氏達觀草堂

放雀以詩二首祝之

菊

無題

論詩絕句

衡岳禹碑歌

丁酉十二首

春柳三首

四月十五夜月

題香雪閣遺篆

題黃葆儀女史茶香閣遺草

題錢氏霜月吟草

舟發桃源寄懷孫芝房五首

戊戌一首

觀競渡作

己亥八首

路華甫先生齋賞蘭

七夕四首

龍標行

古柏吟

方池吟

辛丑八首

探花詞五首

南歸留別內閣同直諸君二首

張烈婦歌

壬寅二十首

題潘芝亭指畫古松歌

長沙口號

與蘇虛谷論書

月泚園歌

黃春亭前輩宣招賞薔薇賦此却寄

同人遊山寺晚歸一首

讀芝龕記傳奇得秦良玉沈雲英二

女帥詩各二 魏費二宮人詩各一

旅次雜詠四首

春草四首和少鶴

甲辰十二首

奉使途中偶作

舟夜寄懷

闡中卽事八首

滕王閣

大雪憶庾嶺梅花

乙巳五首

題洪樂吾前輩知吾之樂圖

晚坐

偶成

嬰砧課讀圖爲王少鶴同年作

次韵梅伯言翁贈陳頌南給諫卽以送別

丙午三首

送黎枚丞

宗昉南歸

感事

故劍歌爲劉椒雲學正賦

丁未一首

姚子楨同年

羅第

以王荊公唐百家詩舊本寄惠賦此報謝

浣月山房詩集卷一

內集

臨桂 龍啟瑞 翰臣

辛丑二十四首

贈蘇虛谷

大星一夜飛入口化作詩人膽如斗銅琶鐵板聲滿天山精藏遁蛟螭走
蘇君贈我好詩句奇氣紛拏無不有昨來獻賦長楊宮與君馳逐名場中
升沈顯晦各有數男兒豈必悲途窮昔君再出山東道足踏岱宗觀日曉
盪胸不覺滄海寬入眼眞教衆山小今年重渡蘆溝橋草枯雪盡風蕭蕭
青錢三百沽春醪長安市上相招邀座中王郎少鶴亦奇士酒酣拔劍歌
何豪下筆仙語復鬼語薄視漢魏窮莊騷多君才調有如此神物豈合汙
塵滓但恐高堂年鬢侵暫辭金闕還鄉里方今遐荒正多故英雄所貴諳

時務讀書萬卷不知兵又安宇宙終無具君家老屋清且幽歸來圖籍供
其揆整頓乾坤如有意肯抱陰符甘白頭

黃河四首

濁流終古此汪洋西下龍門萬里長星宿水源通上界朔南天氣判中央
春來波浪連淮口日暮風塵接大梁獨上郊原看井邑漢家底績重宣防
今年盛漲入郊墟積水城西幾丈餘百萬蟲沙歸澤國一時魚鼈占民居
元戎幕府空籌策使者輶車自簡書誰使

至尊免南顧保安全在未危初

金隄千里浩無涯歲費洪纖入度支輦去金錢爭土價泛來蘆葦等山移
防川自古無長策經國終難免漏卮解得吾

君宵旰意忍將膏血付沙泥

洪波日夕向南侵禹蹟茫茫不可尋夷險動關天下計憂勞獨繫
聖人心竹流秋盡知無恙桃漲春來最不禁水國由來居釜底安瀾從此
慮方深

新鄭過子產祠墓下作

列國紛爭日興人誦德時至今溱洧上猶有大夫祠政息萑苻盜風懲莫
草詩墓門喬木在千載使人思

雪夜次虛谷韵

旅館寒燈盡征人夜索衣響驚枯竹折影息凍禽飛萬瓦曉煙溼遠山樵
徑稀不知風雪裏天末幾人歸

李將軍射虎行

將軍射石不射虎醒後空驚石沒羽至今真虎晝食人南山居民受其苦

黃蘆葉短風蕭蕭入山不用持金刀手搏白額須與死始知周處眞男子

潁亭懷古

我行日以倦策馬登潁亭日暮見新霽山色延空青緬昔沈寂士高蹈栖巖扃緇塵視軒冕豈以勞心形優游造物外長揖謝明廷茲亭臨潁水馳驅道所經愧彼宦遊子塵鞅何時停寒瀨石齒齒流水風泠泠高人不可作大塊空蒼冥

述懷兼寄諸同好

余家本儒素少小親林邱里門慨跼伏勵志耽旁搜結茅桂山頂俯瞰清江流臨風發長嘯巖谷多清幽抗懷古賢哲恨不從之遊弱冠來湘浦蘭茝舉芳洲遐哉屈與宋斯人不我留駕言徂京國馳驅徧中州燕齊及趙代冠蓋若雲浮風塵豈物色私心徒悠悠計偕凡五上三北非吾憂上第

雖幸竊虛名或貽羞仰視臯夔侶俯懷伊呂儔作室資棟梁濟河待方舟
愧無匡時具何以應所求盛年匪足恃日月忽我適潛心玩竹素努力追
前修時哉弗可失愛此春復秋天涯歲云暮入室寒風颭燈火照簡編此
樂難復休典型誠不遠夙志當見酬寄言同心友庶以慰綢繆

汝橋

數點閒鷗狎浪花汝南橋畔響輕車行人久厭風塵苦一見舟帆似到家

古詩五首

遠山如高士可望不可攀時有蒼翠色飛撲來眉端我欲往從之石徑巖
且頑何當假斤斧一爲劖巔峴誅茅黃葉頂結廬白雲閒放懷陵孤鷺長
嘯招鳴鸞安期與角綺時時相往還長生有靈藥芝朮或許餐

文章雖未藝貴與情性俱眞性苟一滴千言亦爲虛君看揚子雲識字論

五車失節事新莽千古爲歎試觀劉越石文藝頗麤疏歌詩只數闕浩
氣陵八區春華豈不貴秋實誠相須被服苟不完焉用雙瓊琚骨格苟不
稱焉用曳繡裾寄言摘華士根柢富何如

崑岡產美玉合浦出明珠滋生各有類至寶天所儲求之苟以道妙用良
不誣古來賢哲士歌嘯甘茅廬請業者踵門所至或成都德輝應星象善
氣充里閭河廣潤始深道立勢不孤惜哉荆山下獻璞非吾徒

老松臥巖谷幹直陰蒼然人影所不到有鶴巢其顛飢食百草子渴飲飛
來泉清露有時降一聲聞九天

陵烏躡東海耀景都邑中都邑何鬱鬱邸第相交通朱甍百餘尺輝映羅
綺叢門前多喬木嬌鳥哢春風美人捲珠簾一笑山櫻紅朝車正歸來駿
馬如游龍家僮進美酒琉璃金珀鍾冠蓋爛如雲入室生光容幸生太平

世此樂將何窮

舟行晚眺

遠市夕陽中歸帆趁晚風廚烟穿樹白漁火渡江紅水落聞清瀨霜晴見碧容客心最先覺側耳聽征鴻

曉發唐河

久向風塵感倦遊臨江忽喜泛扁舟朝雲乍捲山如畫晴雪初消水更流獻賦相如還作客思鄉王粲幾登樓明朝漸近襄隄路試問垂楊似舊不
途中遇雪示同行諸君

大風吹雪黑雲翻茅屋四捲燈爲昏曉來千里淨如洗銀海爛漫光無垠是時行子正早發苦寒不覺重裘溫凍泥未消馬蹶滑車輪碎碾冰花繁顛搖簸盪無時息心驚目眩手自捫車行一日不數里往往投宿無人村

同行諸子各憔悴挑燈靜對心爲煩側聞是邦土宜麥冬來得雪春苗蕃
乃者祥霽厚盈尺田夫野老歡相喧居人衆多行人少此情當爲天公原
若使冬行不遇雪旅人雖喜農人怨征途遲早自有定忍使無麥傷黎元
詩成天曉雪亦止忽見樹上明朝暎

襄陽舟次贈別虛谷

落拓風前季子裘還鄉更買洞庭舟家無負郭難終隱囊有新詩足壯遊
歲晚歸情湘浦月天涯別夢蘄門秋那堪歧路重分手不盡離心漢水流
漢臯樓題壁

交甫遺蹤豔玉今碧波芳草寄遺心當年解珮人何許漢水東流日夜深
樂鄉關

曉發樂鄉關殘雪光在地銚然馬蹏響亂踏層冰碎初日照山脊晶瑩動

鰲背突兀梵宮聳峭與孤塔對餘霞斷猶赤老柏洗逾翠晴光入草木萬
物有新意隆冬變春容倏忽參詭異念我懷歸人征途恐遲滯出門見朝
陽心顏輒一慰且喜庭闈近家門不日至衣錦未足榮承歡庶可貴日暮
沽美酒聊用博微醉

偶成

積雪初晴欲曙天清霜凝霧復凝煙征人離思歸何處都付朝陽雁影邊

途中紀所見

我行百里餘洪波浩如海孰知汪洋內尚有城郭在城郭何蕭索殘堞空
磊塊泥沙壓人屋尺地無爽塏窟穴逼蛟龍誅求盡魚蟹側聞父老言被
水已三載茲邑本窪下衆流爲之匯田園俱漂沒陵谷亦遷改曩者萬金
室一朝成凍餒貧病走四方溝壑難久待我聞心惻然斯民竟何罪天災

固流行人事或荒怠隄防苟不預幕燕巢終殆手此流離狀吾將訴眞宰

壬寅三十一首

題徐作之歸耕圖

人生當學張騫傳介子立功絕域生封侯不然負郭之田五十畝歸來可
作逍遙游安能奔走萬萬里坐使田園蕪穢成荒邱徐君大隱得此意圖
中預作歸耕計黔婁有婦能甘貧解變時妝作椎髻春來相餉綠畦前看
攜鴉嘴鋤春煙晚歸茅屋飽且醉牛衣擁鼻方酣眠桃源風景在人世眷
屬可以稱神仙多君雅抱有如此胡不歸兮向桑梓君家老屋東海濱側
聞戰卒今雲屯王師自不擾廬市肯使耕鑿妨居人安得隻手扶世宙要
息羽檄清邊塵舉世再返羲皇道退歸林下易初服與君同作耕桑民

湖上

喧聲鵝鴨鬬腥氣蛟龍惡嗟爾湖上民生涯於茲託水去暫棲止水來旋
飄泊生兒水中大了不解耕鑿蘆葦種成田秋老供簾箔時見水草閒炊
煙寒漠漠但有遷徙勞未卜安居樂同爲太平民生計彼何薄

去年築新隄積水蕩爲墟今年修舊隄增高幾丈餘年年事畚鍤何時得
安居湖身半泥沙所在憂停淤春水四溢出浩渺漫田廬古來膏腴地至
今成沮洳濬河尙有術濬湖無成書撫字在良吏保障當何如

憶昔秋夏過積水與簷齊至今沙土痕漸覺茅屋低田舍有新阡村徑無
故蹊東屋挂秧馬上滿塵與泥豈無二頃田那得將鋤犁童稚來乞食骨
瘦氣慘淒投之以勺飯爭食若羣雞家僮叱不去令我心神懷此亦人子
耳安忍忘提攜

洞庭

我昨遊中原平衍莽無界及茲泛洞庭頓覺坤軸隘洪波浮日夜激宕聲
澎湃南來匯湘沅細大收衆派雲夢吞幾許於中絕芥蒂大江流不盡水
勢何由殺湖中小洲百細若浮粃稗君山渺一髮審視力已憊想彼造物
心以此雄南戒浩蕩含元氣奔騰露光怪月夜起魚龍聲如聽梵唄古皇
張樂地流風迥超邁我行蓋已屢每見輒一快乾坤幾須彌納此舟如芥
作詩忝挂漏聊償雲水債

紀事

二月初吉日正午我時拏舟向湘浦春行夏令鬱且蒸皿蟲穀飛象爲蠱
南風三日不得息吹噓未快天猶怒不知大聲何處來但覺洞庭百里之
閒哮如虎江豚拜天不可見驚起馮夷擊天鼓蚩尤旗捲白浪飛橫灑江
干作急雨是時天氣明而晦黑雲堆墨暗窗戶舟人櫂舟聲亂喧倉卒那

能施柔艣岸側有洲急爲進勢如驚魚避網罟後來地隘無所容往往巨
浪隨掀舞客子起看推孤篷心搖目眩聊偃僕山木時與船低昂枕席但
隨波仰俯乃知利害在俄頃惟天有怒誰敢侮挂帆直進豈非計遇險而
退無乃鹵宵來買酒樂長年卧聽高歌起樓櫓

湘源紀行

古木森蒼崖飛雲掛石屋南風三日程吹送湘水曲諸山若屏障秀色凝
可掬時維暮春初晴暉散平陸蘅蕪雜蓼荃細碎紛衆綠山花如有情時
炫遊子目遙看白鳥下徑就陂塘浴淨極不容睡况敢濯我足當年子屈
子行吟想芳躅至今湘水流不共江河濁海洋爾何山

湘水發源興安縣之海洋山

源此中蓄何當訪幽勝一就峰頂宿

題李星門丈

熙垣

松陰讀書圖

眼前不見真山水描摹峰巒徒爲耳胸中不識真古人下筆終與塵俗鄰
星門李丈隱於畫一生水墨精絕倫壯年冠劍走萬里匹馬遠逐京華春
薊門煙樹望不極居庸疊嶂開嶙峋西上潼關去天尺黃河萬里連砂磧
回身却望太行山元氣冥濛盪秋碧歸來圖畫滿胸中筆端縹緲爭神功
尙恨古人不可作無人共語雲山蹤晴日明窗動幽興小卷大軸紛橫縱
摩詰已後作者幾三王秀出今南宗一一展閱心相印置身恍惚登雲峰
疎簾清簟未爲美健人炎夏惟長松憑几淨若無筆墨紙上颯颯生清風
天與煙雲作供養畫圖須眉劇蕭爽會將妙筆窮雕鏤臥遊圖就恣歡賞
吾鄉山水天下奇嵯峨蒼玉前人詩都嶠諸峰更殊絕洞天福地仙靈嬉
其中煙霞日百變遠勝雁宕兼峨眉惜哉荆關董巨不見此畫圖千載無
人知星橋羅子辰老好事尺幅細寫心神疲頗嫌筆意尙繁碎有如凡骨

無仙姿先生老筆近神品山靈豈合含嗟咨小阮況足繼家學謂展之名同年
山寫照今其誰還君此圖三歎吁莫令米老但有陽朔山水圖

由靈川至興安道中作

新涼人意爽客子去閑閑月出萬峰頂風生羣樹閒魚龍方大澤猿鶴自深山遙想白雲裏幽人應閉關

北上有天險嚴關莫與爭半空惟鳥過絕頂少人行草木春山合人煙古戍橫由來荒徼地不敢倚時清

喬木滿山路怪禽聲似歌野田繁紫芋茅屋補青蘿遠道日邊靜亂山晴後多故鄉從此去何日復來過

題呂麗堂太守恩湛射虎圖

昭陵山中有真虎道旁過者無敢語何來太守勇且英麾騎叱咤山神驚

長風捲松百合動霹靂應手雕弓鳴一矢貫吭僵不伏目睛入地光猶綠
當年只遇射彪手怪爾橫行到山麓宏農太守今所稀封邵食人疑是非
安得使君射虎箭坐使巖谷收雄威卽今畫虎陳空迹想見探穴神奕奕
歸來却笑李將軍醉餘空射南山石

棄婦詞

燕支山下花滿天嶺南末利不成田東家有婦方盛年一朝棄置吁可憐
憶昨于歸十六七顏色如花耀君室金屋藏嬌尙畏風玉臺專寵非論日
此時兩美同一心滄海不如郎意深却笑長門當日事區區一賦抵千金
誰知人事須臾變黃姑織女不相見因風柳絮比郎心帶雨梨花羞妾面
妾面自知今日老郎心不比當時好出門却憶初嫁時滿地桃花今白草
回首殷勤重致詞賤妾已去郎勿思却念門前桑柘樹春來莫翦最繁枝

繁枝手種高如許，窺牆猶禦鄰家侮。但願新人故不如，爲郎端正持門戶。
時物從來有變遷，秋風紈扇未應捐。歸來夜夜妝臺畔，悵望天邊月再圓。

題沈友陶雲龍冊子

六月燒空火雲赤，雨工酣卧無處覓。入眼忽覺風霆生，海霧連天黯將夕。
沈翁畫龍古無比，尺幅變化含千里。生材本爲霖雨用，一一鱗甲皆奮起。
我聞天用莫如龍，屈伸隱見無常容。公從何處貌神采，無乃妙筆參元功。
頗疑當年作海客，採珠常近驪龍宅。歸來信手寫蜿蜒，展向晴窗動心魄。
或者前身爲雨師，春雷出地鞭蛟螭。手扶天上真龍子，風浪怒作鱗之而。
故獨寫真在人世，肯使凡筆羞神姿。方今海國民畢逋，東南暑雨桑田枯。
會見靈虬起潛壑，倏忽變幻風雲驅。時雨旣降民其蘇，雲兮龍兮遇合固。
有數安得好手再繪商霖圖。

秋懷一首和張芾卿

秋氣如醇醪近人先自醉秋懷如中酒未倦輒欲睡
蕭蕭涼風起紛紛衆葉墜依依旅雁鳴嗷嗷夜深至
那堪淒警時更感別離思造化本無心慘舒有時異
人生百年景速如奔泉驥甘以寸心微受此俗緣累
天公應大笑蟻視人間世君詩何磊落讀之壯人意
勉此貞松操愧彼桃李媚貞松匪不苦勁節得自試
桃李匪不妍紛華衆所忌和詩聊自廣仰惜年華逝
各抱歲寒心索居以相慰

洞庭中秋待月作

一年一度方宵月獨向江頭照離別幾年客裏過
中秋每對蟾輝悵鴻雪今宵胡爲在洞庭水色山光
正晶潔亭午南風飽片帆徑渡湖心如電掣
轉羈半天霞彩絢琉璃萬頃波紋縵遠岸無烟蘆葦
荒時見漁燈半明滅

須與白氣升東山
遙露玉環剛半缺
天公不合釀微雲
坐使清光現如瞥
江頭鐵笛黯無聲
湘女湘妃共愁絕
素娥深意良可感知
我離人怕佳節
故將霽縠障冰輪
未遣羅襟飄露屑
人生聚散要有常也
似金波遞圓缺
明年烹茗玉堂中
回首江湖思清切

詩成月出因疊前韵

陰霾無端妒華月
姮娥暫與湘妃別
三更捧出白玉盤
擲向湖心濺飛雪
鏡影新磨似更明
練光再滌還加潔
何事更然牛渚犀
碧海長鯨坐堪掣
幽人蓬窗夜不寐
靜對湖光揩眼纈
遠吞雲夢目已了
細讀離騷燈可滅
遙想高寒十二樓
仙風吹響飄環玦
青天碧海幾何年
盈虧過眼風花瞥
廣寒何日不中秋
強立名字真癡絕
故知客懷不可貯
要使傾瀉逢佳節
會當梯雲到碧宇
細嚼桂子霏香屑
奪取吳剛玉斧還
月本無圓復何缺

夜闌忽聽波浪湧
柁樓絃管聲淒切

岳陽樓

岳州城南三放舟
往來未上岳陽樓
樓中仙人應大笑
醯雞安可談陽侯
茲來天氣正八月
涼雨一洗湖山秋
肩輿乘興決獨往
要使千里窮雙眸
君山對我如舊識
雲鬟風鬢烟中浮
靈旗捲波作飛霧
縹緲或恐湘君游
長空飛鳥去欲盡
望眼直到衡山陬
壁間樓記誰所寫
玉虹謂張筆力清
且道希文不作子
京邈俯仰誰抱斯
民憂是邦形勝踞
湖頂中貫南北爲
咽喉東流竹箭去
如駛玉粒香稻千
船收菰苻雖靖蒙

帝力水潦未殺終
神羞春來萬葦綠
如海但見鳬雁來
沙洲澤國甫田荒
者幾那得婦子安
鋤耰祇今誰是滕
公儔斯樓已舊煩
重修使我望遠心
悠悠

答朱伯韓前輩去歲見贈詩一首

余生鮮兄弟爲學常患獨每見同志人重之逾骨肉辛歲始識君聯鑣戰
場屋雄文富波瀾浩氣吞岳瀆余時齒尚少見面頸輒縮弱冠遊京華計
車正相逐箠雪不我待先騁騏驎足是時長安居得共聯牀宿河漢轉夜
闌清談時剪燭君言天下事擔荷在吾屬康濟正需才同心願相勸又言
古人交期許重心腹詎徒尙聲氣外華鮮中樸側聞長者言頓使雄心伏
平生金石性未遽諧流俗感君敦古誼得以雁行目去歲對

大廷甲科蒙首錄芸館有先型蘭臺步芳躅貽詩厚相勵高誼見忠告翰
林儲材地匪徒修邊幅禮樂及兵農經濟當預董耆耆陳文恭斯言可三
復日昨東南來凶夷恣慘毒長鯨走岸旁吞噬飽所欲安得倚天劍迅掃
妖氣速備員忝侍從倉廩盜微祿誰使

至尊憂要亦吾輩辱吾兄匡時志觀此眉應蹙行將列諫垣丰采覘秦牘
上益

聖主聽下爲生民福賤子實不才敢和陽春曲前修願交儼良箴時往復
庶幾雷與陳交情老愈篤

山行道中作

衆山鬱氣氤蒼蒼逼諸天平野豁然開下有陌與阡人家傍山澗繞屋飛
流泉新晴融地脈草木增清妍鳴雞互相答喔伊破朝煙山翁晝出汲挹
露拾秋餽顧我興蓋客咤歎驚神仙人生有定分豐嗇理難全安知奔走
勞詎若安居賢吾方私愧汝未謀二頃田

黃陂道中作

百里黃陂縣蒼蒼落照西斷流胡渡馬深巷夜鳴雞野盡收鹽漬人多市

棗梨南來波浪惡莫上瀟湖隄

百穀登場日農閒方在茲終年勤婦子一飽到孤嫠餘粒雞豚得閒疇
鳥雀嬉安居華屋者風景那能知

野老依山住風塵不到門有閒惟種樹隨意自成村留客榻常掃呼兒酒
重溫田家風景好不敢傲華軒

兒家何所住生小大江邊簾幕編成席歸花種作田機絲鳴夜夜茅屋補
年年不學商人婦高樓望客船

隔里逢村落橋西得幾家水菱圓聚葉山竹暗藏花宿鷺棲煙定歸鴉背
日斜便邀老人語攜手看桑麻

過信陽何大復先生故里

大復山前路詩人故宅存山川餘藻繪文字寓精魂明月篇誰繼風騷道

不洗月山房詩集卷一
三
自尊元音消歇久惆悵與誰論

過彰德

秋來策馬渡清漳入眼蕭森柳萬行客夢半醒殘月上村炊乍熟晚風香
鄴中諸子空文藻河畔高臺自夕陽千載霸圖留不得西陵煙樹鬱蒼蒼
曉發邢臺大風作

天門晝啟靈旗軒帝洩其怒翼二奔紛紛砂礫來驟雨滾滾煙霧凝黃昏
東來已愁渤澥溢南下更恐河源翻行人伏車不敢語待掃黑霾看金盆
以水仙花贈錢萍石同年寶青疊韵二首

水仙本花王素豔羣卉伏媚然如靜女無言自清淑惟子與此花對影稱
雙玉惟我與夫子臭味實一族聳盆手自執淨極若新沐中有小白石細
寫秋蘚綠晴暉照窗牖羣葉抽簇簇我齋實荒陋得此春意足因念君子

室寒霜圃老屋北風吹海棠燕穠雜衆木

君性好海棠會手植焉

榮華有時謝舊遊

那忍觸不有綽約姿何堪媚幽獨移根得善地是亦花所欲聘錢豈必費
佳客來不速遙知清夜裏靜展離騷讀屋暗燈火寒漏永幽香逐清如和
靖梅韵勝子猷竹會當踏雪來對坐領芬馥

羣芳鬪香國佩彊未肯伏竊意太真豔未若江妃淑仙人海上來翦此一
叢玉與梅雖異類香豔乃同族肌膚結冰屬客華屏膏沐憶生沙岸旁晴
波漾空綠靈根得灌溉嫩蕊紛纒幾不遇寒芳人汀洲老亦足一朝入城
市供養珍華屋託根益益間斐几藉文木俗工強位置凡手競相觸誰知
草木情厭衆常喜獨幽賞固所期喧譁諒非欲甘爲北枝後恥效唐花速
何修近君子得伴芝蘭讀晨昏對清影永謝紛華逐想見空谷姿日暮倚
修竹歲寒君勿怨閒居守芳馥

城南看花和王少鶴

錫振

並邀姚子楨

輝第

錢萍石

寶青

同賦

寒鴉曉唳日在東
輭塵不起天磨銅
城南花市春融融
長安貴俠連錢驄
車前載花如遊龍
我亦逐隊驕春風
勝遊樂與三子同
入門香霧霏冥濛
蘆葦小屋形如弓
胚紅孕紫藏窖中
海棠睡起嬌欲慵
水仙妃子清而丰
俯仰山茶紛纖穠
未若老梅冰雪容
白石瘦倚蒼苔封
頗惜市人皆奴僮
盤屈直幹成疲癯
炭以獸炭金爐烘
繁花一夕交蒙茸
縱極人巧非天工
攜歸老屋陪歡悰
聘錢雖貴難辭窮
華筵自壽金珀鍾
我儕年少如終童
朱顏足傲春花紅
京華旅宦時相逢
人生聚散如飛蓬
他年月落空山空
應有好夢隨秋鴻
作詩繼聲二客從
願如此花盟其終
隨風開落莫怱怱

癸卯七首

人日贈王少鶴

時少鶴有南歸之意故末句及之

去年今日逢人日洞口桃花上客衣去歲歸省武陵別夢難尋芳草路鄉心猶戀釣魚磯六街烟雨連年換九陌香塵撲面飛待得春來花事好天涯莫羨雁先歸

遊春

春遊無定處遠近隨馬蹏十日不出門春草綠已齊柳色如黃金昨枯今始穉東風陌上來十里開棠梨海棠及文杏露重垂欲低獨有野藤花寂寞傍荒畦恰似田家女淡泊甘鹽齏安知桃與李無言自成蹊數年遊京國久與家山違去歲暫歸來言訪漁郎溪夢中桃源洞仙路今未迷撫時感物候歲月難久稽僑居道院旁卉木如林棲曉日上疏簾又聽山鶯啼及時當行樂常恐朝陽西同心二三子勝遊相提攜歸來花樹下莫負清樽期

讀平湖劉烈女遺事作

城頭巨礮聲震天鬼奴傍海飛腥涎東家西家走且顛遇之於塗或殲旃
女聞而起心慨然展轉走匿行復旋依依執手慈母憐樓下古井泉涓涓
俯身下就方及咽阻之不得心則堅女身可捐節可全海氛騷動胡蔓延
蟲沙猿鶴均焚煎何山冰雪埋芳鮮貞魂一縷隨飛烟乘風上訴蒼蒼天
帝命列缺揮神鞭迅掃醜虜清瀛壘安能更化精衛填段沙委石無窮年

秋日作

微風釀薄寒輕雪羃林表脩然無客至庭院深以悄牽牛花已過尙賸霜
藤嫋時於籬落間扶疏見紅蓼高槐隰螭蟬急響今漸少寒鴉亦知警飛
鳴自昏曉靜觀感物化榮枯互相繞造物本無心羣動自紛擾看看霜中
柏蒼鬱插雲杪又看野塘內菰蒲亂青縹人生天地閒賦形殊么藐安得

隨時變悲鳴雜風篠方知騷人輩所見猶未了

獻姚石甫先生卽以贈別

十載滄溟外崎嶇未盡身人心厭驕虜天意認孤臣別思千山月歸途萬
木春征衣惜輕浣知爲

帝京塵

未了看山願城西住少時夢猶京闕戀歸爲友朋遲黃葉聲中酒蒼苔閣
上詩東瀛一回首揮涕萬人知

老矣猶茲健風塵想據鞍艱危緣世變摧折見才難卧虎滄江靜冥鴻天
宇寬願公珍晚節歸路雪霜寒

甲辰五十九首

奉使粵東出都門作

積雨逢初晴郊原澹暑草木含新意快如目未覩夙昔西山色延望在
庭戶逶迤沿其麓石髮紛可數林開霽色見峰淨雲容吐晝長蜩始鳴晚
熱蚊猶聚念彼僕夫勞喘吁氣如縷王事有程期遲速難自玉清風何處
買作詩聊慰汝

過河間獻王墓

嬴氏愚黔首羣經遂遭燔菽粟委塵壤聖道不復尊炎漢挈天綱六籍光
幽昏王生際平世儀彼先聖言皇皇日華宮文士供駿奔撥拾灰燼餘刮
磨如奩尊維時周禮經成書貢天闈大哉聖人道朗若扶桑暎廣川產鉅
儒王實開其源吾門有傳法功與十子論如何千載下邈俎不復存我來
重憑弔坏土餘荒墩鬱鬱松柏樹青青拱墓門石馬雖已折佳氣被無垠
斯文其在茲來者永無譏

沙隄行

君不見道旁沙隄白皚皚凍雪融盡無纖埃春雨一洗十丈裂礫崖轉石
聲轟騰行人失足易傾跌策馬欲進終徘徊乃知易築旋復潰古來金隄
安在哉

道旁見田家二首

余生在塵市未爲郊隴行賴於客旅閒得知田野情稍能辨菽麥兼喜聞
雨晴茲役維仲夏原隰騰炎精二麥已登場文雉驕不鳴高粱及晚稻薺
薺含金英瓜田繁紫芋翠葉紛縱橫朝陽擢寸穗夕露抽尺莖時見野老
來荷鋤如春耕問之何其然辛苦歲有成田家婦子閒城市渺所營耕饑
得自盡飽此粥與羹用茲勞筋力行與壽考并豈如彭澤翁尙以善自名
對此私用愧吾亦拙謀生

憶昨出都門禾黍青離離漸入齊魯郊穎粟紛歲蕤及茲過淮泗壓隴黃
雲垂感彼華實異如覺經旬時旬時尙云爾歲月亦如斯嚴律轉孟冬茅
屋迎朝曦新糧已入甕陳粟亦在炊遙知此物候正我歸來期今年雨暘
若高下恰相宜時哉及秋穫場圃築毋遲歸來當賀汝爲汝歌京抵驛路
多好花紅紫紛高枝時物易變換我行胡遽並但使慶有年餘事安足知

東阿道中

碧嶂參天影四圍松林一徑破煙霏朝行石磴看雲上暮入山樵送雨歸
景物漸宜鄒魯近峰巒欲認楚黔非乘槎更有滇南客

謂何根棖觸鄉心
雲前輩

十載違

固鎮題何氏別墅

妙得林亭趣簷楹敞更幽疏花微見日高樹遠含秋隱几山光接開軒野

色浮征途苦塵土爲爾一遲留

渡淮

時中牟大工未竣黃水迸入於淮書所見作

爲問長淮水頻年更若何舊流歸海疾新漲近城多自可吞壘派焉能受
九河曾當分濁浪還爾舊時波

廬州

我行廬州夏六月火雲燒空四山熱早禾割盡晚禾枯老農踏車汗流血
開渠引泉亦何濟昨日有水今日竭行人下馬驛亭裏一飲清泉冰到齒
問之致此路幾何云自村南十餘里憶從兩月皆大旱近井泥乾無滴水
淮北諸邑地苦低春漲灌田田成谿淮南諸州亦沃衍黃流泛溢侵畦畝
是邦形勢占高原南來坡坨似陟嶺餘波不及未足俸亢陽偶遇知難免
深山旱魃胡跳梁平地蛟龍易偃蹇我今作詩爲汝告要與赤子蘇殘喘

夜來涼雨飛高松雷聲隱隱東南峰嗟爾民兮慎勿苦擊鼓吹笙報田祖
新晴行山澗作

川原新雨後驅馬復行行日薄數山影天空一鳥聲遠林散煩煥曲澗洗
幽清獨有芙蓉渚遙遙芳草情

晚宿店埠

客途苦炎熱征輿困怠偃行行日已暮詰屈下山阪喧聲鳥雀散暝色牛
羊返繽紛古澗藤歷亂幽花晚隱隱聞輕雷迢迢隔雲嶽欲宿投何處野
澗人家遠華燈照古驛蒼苔閉深苑蕭然一雨來清風動羅幃離懷度長
夜欲寐側復反長路無書札何人問餐飯

大峽關

入山天冥冥出山風泠泠出山入山各異態平原芳草長青青千巖萬壑

不知數何年琢就蒼玉屏長松百尺誰所種一一偃蓋皆龍形深林雲日
含變幻騰躍光怪藏精靈峰頭積霧晝疑雨髮鬢尙帶龍涎腥石滑尙愁
行旅過徑仄或恐猿猱經道旁野藤花厯落含芳馨老鴉銜子種巖谷霜
根蟠結餘千齡一翁賣茶貌何古終日宴坐惟茅亭鶴髮非仙亦非隱得
毋內視存黃庭我生日夕在塵世勞勞軒蓋何時停他年待訪赤松子有
緣無慮雲巖扃

桐城

桐城山色遠連天萬疊嵐光落馬前幽澗藏花迷野寺小橋通竹隱人煙
秋藤處處青圍屋晚稻村村綠滿田惆悵簡書多促迫未能佳處便流連
黃梅江漲以舟濟五十里阻風不得行榜人進香稻白魚甚美詩
以紀之

陸行更乘舟放眼輒一快方覺五十里所見未爲大孰知片帆發適與飄
風會停舟候不前小憩猶可耐日午饑腸動筋力稍覺憊水村遠城郭欲
市苦無賣榜人大解事壺餐具不戒玉粒淨可數銀絲細堪膾精鑿去糠
粃鮮潔謝蔥芥食罷思更索老饒無乃太行廚致珍膳圖飽難一噉豈知
眞味存美在芻豢外吾鄉近澤國魚稻家風最他年灘水旁蓑笠尙足賴
此飯未可忘此地儻能再

題潯陽驛館

南去悠悠天塹長郵亭駐馬玩年芳閒門有路侵幽草高閣無人送夕陽
江到湓城聲漸大秋來彭蠡氣先涼琵琶消歇誰堪問獨向風前一引觴

過廬山遊東林寺

我從江北來已見匡廬峰天門晃蕩射初日赤霞照耀金芙蓉渡江覲面

無咫尺秀爽使我清塵胸潯陽旅舍偶一駐夢想勝概精魂通山靈爲我
助清興曉行未遣頭雲封老松蕭蕭倪絕壁石徑獵獵驅長風千巖萬壑
不可計攀陟有願知難窮不知香爐之峰在何許但見往來雲氣飛冥濛
羣峰負地皆湧出靈鼇掉海羣魚從鱗甲之而了難辨巨脊突兀撐青空
我疑鴻荒渾沌誰所鑿得毋神工鬼斧精磨礪萬年元氣老不死出沒光
怪含清雄天台雁蕩果何似未知奇奧當誰同遠公蓮社有遺跡小憩一
一稽靈蹤老僧爲我指林岫辨別名字分南東開先棲賢俱不到雖有二
勝無由逢東坡先生有我生曰在山水窟當門桂嶺青巖崿探奇往往薄
目見浪說泰岱誇衡嵩茲山之遊十日耳倉卒未得攜枯筇乃知人生修
遊覽及其旣至心轉慵却尋驛路滿斜日陂陀掩映林光紅歸來應更山
下宿待識眞面難匆匆

曉發

宵柝遞急響晨關啟嚴扃僕夫趣我駕吏卒候郵亭披衣攬帷幕曉色辨
窗櫺斗室貯虛白樺燭光猶熒危檐掛殘月破壁見疏星主人治離筵桂
盞傾綠醕對此不能飲馳心入郊坰郊坰滿初日雙旌鳴和鈴霏微草露
溼繚亂林花馨飛盞上長坂仰視天杳冥寓目有奇賞躡足無昔經朝逐
纖御返夕共義轡停寄語林棲子無爲嘆勞形

東軒

瑞州府試院左側蘇文定監筠州酒稅時所作

幽軒下夕陽庭宇森衆綠古人遊息地遺芳在卉木卉木豈昔栽沿砌補
修竹墻東李與桃嫩葉青蔽蔽緬昔次公賢宦小志不辱抽閒簿領餘退
息茲焉足阿兄黃州來十日假休沐依依老兄弟握手話幽獨蕭瑟夜雨
涼黯淡寒燈續室有犀角兒詩句清如玉傳家賴汝賢歸計可預卜爲指

夙昔心信美嵩山麓茲軒特寄耳鴻爪驗芳躅我來風雨夜更翦窗前燭
空庭悄無人影動花枝簇新詩猶可繼古道那能復惟有檐閒月曾照對
牀宿

明珠篇

明珠棄道旁光耀人不識賈客東海來見之三歎息世人浪說明月璣肉
眼安知魚目非石家百琲矜言富唐宮一斛空爾爲漢臯煙草斜日暮仙
子淩風去不顧由來交甫未識真棄言祇恨江妃誤千年寶氣在江干化
作芳蘭綴秋露潭邊昨夜老蛟鳴深林月黑飛鼉精白蚌潛波玉蟾沒萬
里秋空無復明始知奇寶在人世鬼物震盪天神驚古來荆山之璞和氏
斯識豐城之劍雷煥是得噫珠兮珠兮我能拔爾出泥中置爾光明之桂
宮使爾劍珮相磨礪但恐宵來望氣驚驪龍風雷攪去迷無蹤我欲拂拭

將安從

發萬安行山溪作

遠山延空青近壑俯寒綠縈紆一石徑細如腸在腹清陰古檜蟠奇氣蒼
松鬱幽花每倒垂怪石故斜出平皋露野田晚稻青簌簌時見遠人村環
繞山之麓牆頭引瓜蔓門外補修竹下有雙板橋溪流瀉寒玉我來乘清
曉佳氣滿巖谷天風吹雨雲前後互相逐村雞破午啼煙散聲喔喔賞心
極清曠引興在幽曲一覽焉可窮十日良未足樂哉此清景游蹤謝樵牧

道中雜詩三首

路轉山溪深復深何年古寺陰沈沈老僧飯飽鐘磬寂門外野風吹竹林
天際黑雲掃不開山風吹雨撲人來馬頭忽訝數峰失村女田中收麥同
江頭夜雨新漲濶秧田放水聲活活十里桔槔靜不鳴入耳羣蛙強喧聒

嶺頭黃日高三丈馬首紅雲低一抹山翁汲水烹苦茗道旁誰解行子渴

大庾嶺謁張曲江祠

東山西山雲氣濛馬前忽見青龍窺不知梅關突兀在何許絕頂尙有人
煙通巔南諸山顏盡赭奔走荒原亂如馬天教留此作崇墉瘴煙隔斷蒼
梧野曲江相國命世英作事能使山神驚不然螺旋山磴二百里炎荒萬
里無人行枕椰葉密天欲雨古寺空垣走飢鼠一代宗臣濟世心千年祠
廟荒山至廟前梅花三百株花時氣壓蠻雲麤相公風度猶想見令人不
憶孤山逋南來奉使六千里眼見雲山幾如此攀崖緣壁不須驚嶺南風
物故鄉情歸時正及南枝發待向祠堂餐玉英

南雄江上

遠水蒼茫一葉舟乘槎眞作海南遊綠橙過雨香初透丹荔含霜晚未收

極浦蛟龍潛永夜深山鸞鶴起高秋南來欲問戈船事畫角西風滿舵樓

夜泛

近水急如箭遙山去若浮祇應明月影不共大江流

觀音巖

在英德縣

峭壁遏奔流屹若干仞鐵何年六丁斧斫此一線裂驚移老狖巢走避潛蛟穴龍宮浮羣木湧現金銀闕上絡天梯通下懸地維絕中有長明燈萬劫光不滅我孥小舟來探彼雲水窟初若虛牝投漸覺幽扉閉秉燭造深迥緣磴趨拘折軒豁見禪堂小憩忘盛熱石壁本天成潦倒古碑碣卻觀窗楹外遠揖三峰列更上古佛龕隨山露凹凸當檐滴石乳幾辨青蓮綴欲墮不墮時狀若箕噏舌靈境吁可畏幽芳猝難擷下巖理歸棹靜聽迴湍咽頗聞水月觀

在巖西北

與此風景別惜哉咫尺地欲往不敢決迴首巖間

樓但見香篆結夜來孤枕上鐘聲盪斜月茫茫煙水際清夢不可越曉風吹片帆妙想參寥次

峽山寺

在清遠縣

昨遊觀音巖已識峽山寺朝來鼓枻往脚健意頗銳仰觀衆山合似束奔流勢石根浸沈綠倒插疑無地突見金碧宮聳若凌雲氣捨舟入寺門老衲拱而侍西堂引客坐軒豁掃塵翳長風捲江流俯視心轉悸是爲凝碧灣妙語坡公記西北循曲磴歲久蒼蘚膩捫壁見古藤石罅霜根利上連老杉枯雲日互虧蔽何處大聲發颯然風雨至飛沫濺巖壑餘潤侵山袂巖間瀑布落奔驥猛難制僧言此泉好佛土資灌溉引澗通山廚何用餅疊致亭前烹茗茗甘冽快一試盤飧復再上山半得小憩松陰覆石牀側度清風細似遊太虛境聆此鸞鳳吹却觀古飛來縹緲青林際遙遙帝子

居白晝巖扉閉仙蹟縱難尋半途安敢棄淩虛造幽竄取徑愈深邃參差
玉宇出燦爛丹霞被何年舒州來飄若流星墜壁閒古碑碣詎有六朝字
相傳寺於梁時自舒州飛來有神人夜叩真俊禪師語其事茲山神仙宅頗具煙霞秘老僧一何愚荒
怪託山魃轉令二禺祠千載失位置二禺祠乃祀黃帝二子者今寺僧更建佛像於中而移二禺祠於山麓
聞歸蜺洞遺事尤詭異仙人久不出山徑亦蕪穢我欲窮其勝餘勇賈難
繼逡巡赴歸途力倦時恐躋同觀舊遊處一一雲煙逝東行逕禪房南與
高峰對微陰連眼色江樹動蒼翠歸船猶恂恍清境入夢寐

歸蜺洞

世傳孫恪袁氏事創此

幾日修真隱石關暫時遊戲向人間曾隨帝子偷丹訣又向高僧返玉環
別後薜蘿無怨遙夜歸來鸞鶴嘯空山卽今洞口蒼雲滿採藥靈峰還未還

三水縣

南滙三江翠嶂連浮家初見蠻人船寒流夜漲潮通海急雨秋來霧滿天
林際酒香椰子熟嶺頭日落荔枝然西來已飲吾鄉水欲覓雙魚何處邊

三十六江樓

在三水以三十六水匯於下故名

卅六江流勢盡吞危樓過雨瘴煙昏估船不待西風起直趁歸潮到海門

花田

廣州城西南十里南漢劉鋹宮人名素馨者居此歿卽葬焉素馨較他處更盛

廣州城南香作國千載靈州瘁芳魄五更晴絮吹曉風滴粉搓香萬株色
芳華苑裏花無主豔桃穠李爭相語蓉城窈窕瑤英家玳瑁爲梁珠作戶
誰知原是此花身陌上歸來暗惹塵金燭銀屏雙照影玉顏珠字兩宜春
宜春別苑仙人住畢竟芳名被花誤紅雲夜醉綺羅春碧月秋驚煙草暮
昔年名花變香骨十里幽聲黯不發至今香骨還作花素豔娟娟弄秋月
樓船簫鼓付滄波南漢繁華掣電過何似停機江上路清芬還比舊時多

瀕行諸生餞於花地即花田賦此誌別

是邦豈吾土小住已彌月諸生四方志行將赴京闕聚散詎有常跼步視
燕粵胡爲一樽酒意等瀟陵別憶昨歌鹿鳴上座余幸竊我義青袍彥濟
濟在行列大僚走相賀茲榜盡時傑執贄至階下覲面始清切會城賓客
衆典謁無時輟倉卒間行第坐席不得熱今朝喜再晤姓字猶恍惚深秋
鴻雁來嶺路梅花發悠悠行子心劍氣衝霜雪長安壯遊地城西盛簪笏
策蹇儻肯來問字尙能說茲行勿相送來日多於髮

黃生

子璣

績學士辛苦三十年唐生

承恩

耿介者囊中無一錢譚生瑩實

奇傑文字富千篇我觀諸子中莫如三子賢覲面始一再衆美知難全我
才實粗疏忝此一飯先常恐志節墮科名重無緣諸生始得舉視此若登
天孰知道其途有如尋常然名至實不充戰慄時恐顛人生祇百歲時事

多變遷當世尙無述來者何由傳勉矣千秋業母爲虛名辜

茲地號花田種花如種穀耕耘所不事利可專菽粟想當南漢時佳麗侈
金谷珠樓運道左畫舫張羅穀香風捲地來紅翠紛簌簌憶昨承平久闌
闌頗豐足笙歌夜成市燈火照華屋天道本惡盈何當縱人欲比年海氛
肆繁盛非始椒招禍固有由此理幽可燭諸生念桑梓訐謔想預蓄寂寂
煙月地風景何由復他年論時事夜坐應更僕

今年秋典試羊城徹棘後疲於應接知有詩人張南山先生而未
暇一訪挂帆後悵然久之舟過清遠峽遇王恭三明府同年手游
仙唱和詞一卷見示蓋先生首唱而黃荅石比部和之余愛其詞
因題七絕四首寄正

織就登科記一篇匆匆忘訪老張仙誰知廿曲鈞天夢觸動靈心五百年

玉韶分夢佐紫宸碧桃花底過千春雲端一笑君知否綺語消除現在身
絕調初平有繼聲泠泠鳳管和鸞笙霓裳舊譜分明記暫欲拈毫怯未成
碧宇颿詞唱夜闌紅雲遮海曙光寒人間不敢尋常讀歸去瓊宮洗眼看

舟中雜詠六首

海珠臺上海珠浮十五娃兒解放舟船裏織將花絡買也應勝作石城遊
曉樹陰森帶露腴荔枝灣裏翠縈紆因未識楊妃面贏得芳華南漢苑名十

萬株

三江口外織風梭圓樣輕浮穩似螺草長斷人不識往來應是蜃船多
韶石江頭尙巋然泠泠風起誤鳴絃峰名在英德南誰知寶瑟淒涼曲輸與衡湘

一派煙

中宿峽中潮水來潮來經宿復潮同於今江上潮無信野老山葱任意栽

海表功名孰破荒，風流人羨曲江張。
嶺頭尙有祠堂在，消受梅花是鐵腸。

中宿峽

雙峽關山門滄江，勢盡吞鳥呼。
黃葉下蟻去，白雲存古剎。
餘鐘響秋江落，漲痕山僧知。
許事採藥自朝暮。

補遊水月觀

游山不盡山，意如素通負。
豈必所歷勝，懷疑終欲剖。
昨來觀音巖，石洞秘深黝。
沈陰壓虛殿，驚視不敢久。
頗聞茲觀殊軒敞，出其右。
覲面不一到，旣往吾則咎。
北歸纔兩月，巖扉幸得扣。
小舟接石磴，仰面見窗牖。
拂衣識水蕉，納履辨山韭。
虛堂鑑江色，高潔不容垢。
岸前諸翠鬢，蕭立若頻首。
長吁盡煙霞，高據失培塿。
壁間蒼霧出，丹崖塞其後。
古藤纏石罅，一一皆瓊玖。
茲地實奇特，與巖爲先後。
吾欲書摩崖，光怪字如斗。
來者慎勿笑，靈宇神

所守

秋懷四首

夜深江月照人寒
森森煙波水國寬
昨見曉風披綠葦
近傳宵露溼紅蘭
西窗舊約論刀尺
南浦秋心怯綺紈
欲賦離情且拋却
嶺雲原不見長安
我有高堂浙海濱
一家分作宦遊人
暫勞定省惟諸妹
且喜康甯未老親
望遠豈無烏鳥思
懷歸應畏簡書頻
近聞澤國安魚蟹
萬里馳驅慰此身
瀟湘驛路洞庭舟
十載重湖感舊游
書授伏生誰惜老
謂黃虎癡學博詩成平子
但工愁
謂張哲堂茂才未看別後書盈篋
可憶登時月滿樓
欲向西風問消息
澧蘭沅芷不勝秋

西江原自桂林分
曉日蜩聲嶺上聞
斥堠遠連番長國
樓船空憶伏波軍
荒荒瘴霧迴炎海
渺渺知交隔暮雲
猶喜故園無恙在
晚來松菊自纒紛

喜晤王恭三同年至韶關又言別賦此以贈

客舟岑寂甚相見爲顏開芳草秋前盡碧雲天外來江月迎詩舫燈花照酒杯早知行客意度嶺首重回

晚望二首

茅屋欹斜野老莊數叢秋柳抱寒塘夕陽一片疏橫影知道前溪夜有霜尋常一樣江頭月照作秋光分外寒酒後花前等閒事未應留向客中看

十八灘

贛江之水利如鐵觸石爭撞勢將折奔流劃轉怒有聲三尺雪浪將舟齧何人鑿就十八灘江心巨石紛簇攢至今此險滅不得長年三老增愁歎我來積雨添新漲石角嵯峨沒高浪中流迴轉作盤渦舟人指視猶惆悵北望江湖深復深老鴉唳徹古榕陰造物設險蓋有意對此可鍊行人心

蘇子南來說惶恐壯志消磨詎爲勇我今海上攜明珠光耀足使江神趨
夜來寶氣徹幽都風前莫怪灘聲轟然犀相照非吾徒

泰和大令沈槐卿同年

行慶

泛舟相送至廬陵賦此以贈

與子遠離別掉舟相送徐莫言一日聚終勝數行書中澤苦鴻雁長江多
鯉魚近聞書下考守拙意何如

連日北風起天涯將歲寒滄江向晚急遠樹入雲團客久思歸切宵深話
別難明春桃李月相憶在長安

過黃梅紀所見作

淼淼長江北孤城舊日經凍來山更綠雪後草終青衆木餘生意羣峯儼
畫屏沙明去鳥蹟隄起伏龍形曉霧冰花圻朝陽露葉醒寒轉茁菊
圃晚猶零走馬莎痕亂多魚口氣腥浮家依短棹寄蹟等飄萍稚子窺牆

立鄰翁擁壁聽故衣形黯淡容巷影伶仃憶昨車初過洪湖漲正淳頗勞
具舟楫何處覓郊垞漁網蒙高閣簪車挂遠汀殷勤問疾苦飄泊閔生靈
歲晚災方澹旌回馭暫停隴添新版築田認舊畦町撲被投荒店披衣上
短亭早餐人二鬴薄醉酒雙瓶俯仰關民命周游感使星生涯憐細碎肉
食忝芳馨願附輶軒採歸陳
黼座銘降康惟樂歲長此頌

壽齡

余於辛丑歲請假南歸同行爲蘇君虛谷旅館對牀征車把襁唱
酬自適商訂多資良時難得計相距已三年餘矣追思我友悵然
久之

每憶吾鄉蘇季子朗吟佳句挾飛仙秋風匹馬看山出暮雨荒村對榻眠

歲晚幾回驚遠夢夜寒何處聳吟肩行囊無恙花箋在惆悵天涯月正圓
乙巳十五首

春夜

檐前丁香初發花游蜂喧闕朝成衙盆中海棠更嬌絕一枝綽約臨窗紗
至人出游歸每暮粉牆上月驚棲鴉近鄰香氣襲鼻觀解醒安用龍團芽
燈前倩影呼不出時掩翠袖慚嬌娃憶昨來京寄道院當春卉木猶可誇
二花丰韻並殊絕開時燦爛如明霞道人種花不護惜往往攀折隨鄰家
我時獨居感幽興撫樹躑躅恆咨嗟良辰美景豈易得年年芳草天一涯
當時觴詠二三子聚散久如鴻踏沙祇今對此憶疇昔未免匆促憐韶華
花顏窈窕尙可復飛輪一去誰能遮對花酣卧豈有極欲覺恨無晨鼓撾

戲贈唐子實

唐子讀書氣欲腐夜宿中庭不閉戶短檠照室寒且深箱篋圖籍交撐拄
有懸緣牆下窺矚靡然一橐牛腰巨公然攫去出不謝不信并取有牧圉
吳綾著手冰繭滑越練臨風玉花舞先生晝出長安陌儒服稱身何舉舉
醉中顛倒不自惜酒痕狼籍汙塵土豈期肱篋一朝盡青氈僅存抑何苦
朝來日色澹沖融處處游春醉羅紉先生當晝恆假寐朋儕邀約惟堅拒
浪說綺思今掃除口縱強辭心可覩伯韓侍御妙語言謂子危失天必補
塞翁失馬穀亡羊待釋褐衣親袞黼觚生有說不謂然亾弓固楚得亦楚
若云小損當大益此意貪天天不許勸君出鑷買新衣陌上看花過好雨

送唐子實歸里

親知如北雁一一向南飛漸覺鄉音少尤傷同調稀關河恨修阻景物惜
芳菲招隱向何處桂山深翠微

唐子有書癖歸裝論五車名爭一字巧才富萬言虛知己贈長劍旁人嗤
蠶魚不能上薦達相送意何如

登高望遠海

登高望遠海落日天際黃風塵黯原野衆山鬱蒼蒼極視大漠北下斷飛
鳥翔忽覩元雲來起自窮髮鄉隨風舒素雲四散紛飄揚照作丹霞幄燦
爛金色光羣峯排中天華萼成文章須臾歛暝色四散如頽牆氤氲蕩元
氣恍惚難具詳焉得兩黃鵠陵虛叩天閭

偶成

榆槐交綠草痕侵四月風光小院深睡起不知新雨過但言今日是春陰

朱伯韓先生新鐫歌題辭

芳塘夜雨香發荷小閣兀坐驅睡魔書燈如豆供吟哦鄰雞無聲夜蟲寂

乃讀朱君所箸樂府新鐃歌鐃歌五十章偉烈陳頗多我朝

先皇楸神武以古相較百倍過君從

國史見舊本私家簡牒供爬羅芸窗晝賦日五色雲錦織字龍騰梭鼉擲鯨呿露光怪氣燭北斗聲流河金石刻畫固史職君之才識難同科外人相賞在文字豈識大義懸義娥頌含規誨著古昔觀此猶念陳卷阿

國家開創在武略濟陽奮起揮天戈興王要當本仁義亦有將材兼牧頗承平數世猶肄習旗營勁旅紛番番攻無不克戰必勝翦除巨慝同么麼百年安飽餘癩習耳聞金鼓言已訛憶昨海氛肆狼藉東南震盪滄溟波幾令我

皇重宵旰年來沴氣方消磨樓船下瀨爾何力同視褒鄂慚冠冢多君具

此大作手官職又到金鑾坡大唐中興有元子尙紀崖石書摩窠斯文光
燄韓柳亞況紀

聖德逾元和願徵瞽矇被絃管取彼國子相研摩後來觀此念
大烈定有殷武虞猗那罷讀危坐三距躍應知此意無蹉跎

秋日二首

誰云秋日至使我心神驚炎官方授節幾日東南行倏忽變素色發此清
商聲夕陽高樹閒尙有蜩螗鳴響急調復促爲飲瓊霜清蕭然羣動閒萬
景增虛明物類旣如此吾心復何營

方春待和氣遲遲未言歸及茲涼秋至應候翻無違立秋纔幾日已卻葛
與絺夜深掩團扇明月入牀幃涼飈送虛警城城搖窗扉感此坐無寐起
整貧女機及時不爲謀歲暮將無衣

七夕

姮娥夢破秋雲冷，碧蓮開遍天河影。
黃姑織女作佳期，一夜西風動金井。
星宮露涼仙漏永，天船無聲繫修綆。
珊瑚爲鞭起靈鵲，架作長橋渡清迥。
別長會短情苦多，仙語丁寧夜方靜。
人間兒女競傳說，欲覓龍梭探寶訣。
銀鍼彩縷玉盤中，贏得蛛絲千萬結。
雲錦七襄苦費心，天公不識離情深。
爲問天河水，雙星奈爾何。
縱然風浪少，終竟別離多。

天河

送彭子穆歸里

乙巳秋八月，彭子將南歸，自言上書客久，與家山違，去年寄汝陽骨肉相
因依來止蕭寺中，幸無臣朔饑，朝出步廐肆，不顧貝與璣，剔蠹讀古書，勘
別論是非，插架懸牙籤，難逃目所睇。我忝校書職，所好亦庶幾，招邀故紙

旁遇人甘笑譏所得各攜去丹墨無停揮謂言得久處賞析研其微誰知
未半年候此驅驂駢我居固惆悵子行尤嗟歛白露方改節涼風吹裳衣
歸心如秋鴻已逐南雲飛子歸固可樂學道當自肥留子安可得待子及
春暉

雨夜

獨坐東堂上宵深暑氣微窗前新雨過竹外一螢飛腐草溼露徑老荷香
染衣遙憐北牆下葉葉海棠肥

中秋對月追憶舊遊柬蔣霞舫

達年丈蔣於次日續絃故末語及之

平生壯觀能有幾洞庭湖裏中秋月一從假館春明門夢裏煙波三載別
去歲乘槎到南海玉宇瓊樓望清切海濱雲彩如黃龍半夜吐珠氣猶熱
碧城天上捲簾看遙指花田花似雪今宵復此對冰輪小閣幽窗靜相悅

娟娟涼露侵羅紵炯炯清輝照環珞六街車馬闐成塵鳳蠟魚燈光可滅
繁余兀坐渺秋思舊遊湖海誰能說豪情勝概亦偶然回首風花去如瞥
蔣子當年好遊興亦有美酒酬佳節知君乞桂符嫦娥欲往邀君且中輟
八月二十三日一首

聞官何事趁朝車史館歸爲退食餘薄海共安無事福故鄉新得有秋書
雷聲不共秋蚊歛是夕聞雷霜影惟看古木疏但使攤書便高卧敢言今日異
皇初

浣月山房詩集卷一